

【孤栖个白鸚哥<sup>1</sup>】彭瑞珠原作

佢去學校个路町，會經過一頭當大頭个樣仔樹<sup>2</sup>。朝晨，佢遠遠就聽著，當多鳥仔在樹頂搞到盡大聲，當鬧熱。一開始，係幾隻白頭殼仔在該緊講：「出力，出力！出力，出力！」；續等，青啾仔<sup>3</sup>也來加油講：「遽遽，啾啾！遽遽，啾啾！」；過了，係一陣屋簷鳥「唧唧唧唧、唧唧唧唧」在樹頂開會个聲哨。

佢想，今晡日仰會有恁多鳥仔在樹頂搞呢？係，熱天个樹頂較涼爽？抑係，樹頂還有當多樣仔好食？佢臥頭看往上，無啊，樣仔都分人摘淨淨咧，斯伸著一樹个青葉定定。還過，啾啾滾个鳥仔，乜看毋著半隻，就聽著屋簷鳥還在該開會个聲定定。毋過，屋簷鳥實在昶<sup>4</sup>細隻咧，囡在比佢兜大恁多个樣仔葉裡肚，佢當然也看無。

日時頭，佢還在該緊想，仰明明聽著恁多鳥仔聲，又看毋著半隻，行過樹下，乜無看著鳥仔飛走啊，還怪奇唷！放學个時

節，佢共樣行該條路，還言行到樣仔樹下，就看著樣仔樹脣頭个楊桃撥撥跌<sup>5</sup>咧。佢看一下四圍，無風啊，過看一下楊桃樹頂，無人啊！該，楊桃仰會自家跌下來呢？佢行過去看，會行到樹下，就聽著樹頂有英文摻佢講「哈囉<sup>6</sup>！」

原來，係一隻調皮个白鸚哥。朝晨，樹頂該陣鳥仔聲，就係你啻！遠遠有鳥仔飛過，你就摻人喊加幾聲仔鬥鬧熱，難怪佢會聽著恁多鳥仔聲，又看毋著鳥仔。佢乜行過去摻佢「哈囉」，毋過，佢全無插佢。

像係發性<sup>7</sup>个細人仔樣，佢嘴嘟嘟仔，用腳抓<sup>8</sup>起一隻楊桃，喫一口就摻佢擲忒。楊桃還言跌落地泥，佢又抓起另外一隻楊桃來喫，大隻、細隻，有熟、言熟个楊桃，分佢擲到一地泥就係。

白鸚哥，係毋係昶孤栖咧？雖然，佢無插佢，佢還係「三隻鼻空」，已閒管个勸話佢講：「白鸚哥啊，你毋好恁樣！楊桃又無得失你，做麼个尋佢兜出水呢？你屋下人，乜怕係尋你尋到當愁哦！你愛轉去無？你係孤栖，佢來摻你做朋友，好無？」

<sup>1</sup> 鸚哥：音 en` go`；鸚鵡。白鸚哥，白色的鸚鵡。

<sup>2</sup> 樣仔樹：音 son` er shu+；芒果樹。

<sup>3</sup> 青啾仔：音 ciang` ziu er；綠繡眼。

<sup>4</sup> 昶：音 tiong`；太。

<sup>5</sup> 撥撥跌：音 bad` bad` died；紛紛掉落。

<sup>6</sup> 哈囉：音 ha lo`；源自英文 Hello，你好之意。

<sup>7</sup> 發性：音 bod siang`；鬧脾氣。

<sup>8</sup> 抓：音 sa`；抓取。